

ՀԱՐԱԿՑԱԿԱՆ\* ԿԱՊԱԿՑՈՒԹՅՈՒՆԸ ԱՐԴԻ ՀԱՅԵՐՆԵՒ  
ԲԱՐԴ ՀԱՄԱԴԱՍԱԿԱՆ ՆԱԽԱԴԱՍՈՒԹՅՈՒՆՆԵՐՈՒՄ

ԻԻՋԱ ՆԱԲԱՆԴՅԱՆ

Վերջին տասնամյակներում հարակցական կապակցությունը լայն ուշադրության առարկա է դարձել քերականագիտության մեջ: Սակայն, ինչպես ճիշտ նկատել են մի շարք հետազոտողներ<sup>1</sup>, այն դեռևս մնում է լիովին չուսափանված<sup>2</sup>:

Սկսած 60-ական թվականներից՝ հարակցությունը, որպես շարահյուսական միավորների իմաստային հարաբերության տեսակ, ձանաչվեց նաև հայ քերականագիտության մեջ՝ դրվելով «հարակցական հարաբերություն» (Վ. Առաքելյան, Ն. Պառնապյան, Գ. Գաբրիելյան) և «հավելական հարաբերություն» (Գ. Զահուկյան, Ս. Աբրահամյան) անունների տակ<sup>3</sup>:

Ինչպես հայտնի է, Մ. Արեղյանը հավելական է համարել միավորի շաղկապներով գրեթե բոլոր կապակցությունները<sup>4</sup>: Մեր կարծիքով, հարակցական կապակցությունը պետք է զատել ոչ միայն իմաստային այլ հարաբերություններ ունեցող կապակցություններից, այլև բուն հավելական կապակցությունից: Ճիշտ է, այս երկու կարգի կապակցությունների համար էլ ելակետային

\* «Հարակցական» տերմինն «գտագործում ենք ոչ այն իմաստով, ինչպես «գտագործված է Գ. Զահուկյանի «Ժամանակակից հայերենի տեսության հիմունքները» (1974) գրքում՝ հարակցական սերող կաղապարի (аппликативная порождающая модель) հասկացության մասին խոսելիս, այլ իրրե ռուսերենի «присоединительный» տերմինին համանիշ:

<sup>1</sup> Н. С. Валгина, Д. Э. Розенталь, М. И. Фомина, В. В. Цапукевич, Современный русский язык, М., 1964.

<sup>2</sup> Հարակցությունը, իրրե բարդ նախադասության բաղադրիչների իմաստային հարաբերության տեսակ, մատնանշել են դեռևս Լ. Վ. Շչեբբան և Վ. Վ. Վինոգրադովը: Հետագայում այն ներկայացվել է ակադեմիական քերականության երկրորդ հատորում (1954), ինչպես նաև Մոսկվայի համալսարանի հրատարակած «Современный русский язык» (1964), Ա. Գվոզդեկի «Современный русский литературный язык» (1968) բուհական ձեռնարկներում և այլուր: Л. В. Щербан, О частях речи в русском языке (сб. «Русская речь», 11, М., 1928; В. В. Виноградов, Русский язык, М., 1947):

<sup>3</sup> Վ. Առաքելյան, Հայերենի շարահյուսություն, հ. Բ, Երևան, 1964, Ն. Պառնապյան, Անշաղկապ բարդ նախադասությունները ժամանակակից հայերենում (սեղավի և ոճի հարցեր, հ. 2, Երևան, 1964): Այստեղ հեղինակը համակողմանիորեն քննել է հարակցական կապակցությունը միայն անշաղկապ բարդ ստորադասական նախադասություններում, Գ. Գաբրիելյան, Շաղկապները ժամանակակից հայերենում, Երևան, 1963: Գ. Զահուկյանը նշված աշխատության «Համադասական կապակցություն» ենթաբաժնում ստորերակում է շաղկապների երեք հիմնական տիպ, որոնցից առաջինի՝ հավելականի, մեջ պետք է ենթադրել նաև հարակցական իմաստը: Ս. Աբրահամյան, Ժամանակակից հայերենի քերականություն, Երևան, 1969:

<sup>4</sup> Մ. Արեղյան, Հայոց լեզվի տեսություն, Երևան, 1965, էջ 654, և հետ:

նշանակություն ունեցող միտքը հաղորդվում է առաջին միավորով, և երկրորդի միտքը «հյուսվում է» լուր առաջինի «հենքի վրա», սակայն դրանց միջև կա էական տարբերություն: Հավելականի դեպքում երկրորդ միավորով հաղորդվող միտքը առաջինի նկատմամբ բառիս բուն իմաստով հավելական հղորդվող միտքը առաջինի նկատմամբ բառիս բուն իմաստով հավելական հղորդվում է նրա վրա իբրև նույնաման միտք: աշխտեղ միավորները ծավալվում է նրա վրա հավասար են լինում: Օրինակ՝ «Շարմաղ բիբին անընդհատ լալիս էր, լաց էր լինում և Շողերը» (ԱԲ, էջ 248): «Հուզմունքից դողում էր ձյունի պես ճերմակ նրա մորուքը, դողում էին նաև ջրուտ ու ցամաքած ձկնաբերը» (ՍԽ, էջ 105): «Միայն գլխավերևում խոշոր աստղերն էին թրթռացնում իրենց թարթիչները խավար գիշերներին, մեկ էլ փարոսի կապուտակ լույսն էր բարակ սյան նման ձգվում ուղիղ դեպի վեր» (ԿՊ, էջ 172): Հարակցական կապակցության դեպքում երկրորդ միավորով հաղորդվողը միայն կողմնակի՝ հաճախեց միտք է. այն կցորդվում է առաջինին, իբրև նրա հետ ինչ-որ կերպ առնչվող միտք: Այս է պատճառը, որ հարակցվող միավորը իր շարահյուսական դերով հաճախ մոտենում է միջանկյալ նախադասությանը: Հարակցական կապակցության բաղադրիչների ծավալը հավասար է:

Հարակցական է բարդ համադասական նախադասության՝ բաղադրիչների այնպիսի կապակցությունը, որի դեպքում կապակցվող միավորներից երկրորդով հաղորդվում է առաջին միավորով ներկայացվող ողջ մտքի կամ նրա որևէ անդամով դրսևորված առարկայի, նրբույթի, գործողության, եղելության հետ այս կամ այն կերպ առնչվող հարակից միտք կամ տրվում է լրացուցիչ, պարզաբանող տեղեկությունն նրանց վերաբերյալ:

Հարակցվող միավորով սովորաբար հաղորդվում է խոսելու պահին առաջացած, հանկարծահաս միտք: Այդ իսկ պատճառով՝ բաղադրիչների իմաստային այդպիսի հարաբերությամբ բարդ նախադասությունն ավելի շատ հատուկ է բանավոր խոսքին: Բայց այն բավականաչափ գործածական է նաև գրավոր խոսքում, հատկապես գեղարվեստական գրականության մեջ՝ երկխոսություններում: Հարակցական կապակցություններ պատահում են նաև գիտական, հրապարակախոսական երկերում ու հոգեվածներում:

Այս կապակցությունն իրացվում է ն (ու), իսկ (մինչդեռ), բայց (սակայն) և այլ շաղկապներով, ինչպես նաև՝ շարահարությամբ: վերջինիս քննությունը, սակայն, սույն հոգեվածի նպատակից դուրս է:

Քննենք տարբեր շաղկապներով կապակցություններն առանձին-առանձին:

Եվ շաղկապով հաճախական կապակցություն—Միավորների և շաղկապով հարակցական կապակցությամբ բարդ համադասական նախադասության առաջին բաղադրիչով հաղորդվում է հիմնական միտքը, իսկ երկրորդով՝ նրան հարակից, նրա միտքը կամ որևէ անդամը լրացնող, պարզաբանող մեկ այլ միտք՝ այլևայլ նրբերանգներով, որոնց բոլորի մեջ էլ առավել կամ պակաս շարիով առկա է այդ շաղկապին հատուկ գումարման, գաղափար: Խոսողի նպատակն է հաղորդել առաջին միավորի միտքը (երբեմն նպատակ չունենալով հաղորդել նաև երկրորդի միտքը) և առանց նրանից կտրվելու՝ անցնում է մեկ այլ, հաճախեցածա մտքի, որը թեև առաջին, միավորի բովանդակության զուգահեռ չէ, բայց որևէ կերպ առնչվում է այդ միավորի (կամ նրա անդամներից մեկի) հետ: ինչպես՝ ԾԽՂ դարը արագ և խոր:

փոփոխությունների դար է մարդկության կյանքում, և դա առիթ է տվել այն անվանել ամենատարբեր անուններով»<sup>5</sup> (Հ, էջ 3):

Հարակցումը կարող է լինել տարբեր նպատակներով, որից էլ բխում են կապակցվող միավորների իմաստային հարաբերությունների տարբերություններն ու նրբերանգները:

Եվ շաղկապով հարակցական կապակցությունները լինում են՝

ա) Հադակցա-բնութագրական<sup>6</sup>—Եվ շաղկապով հարակցվող միավորը առաջինի նկատմամբ ունենում է բնութագրող նշանակություն, նրա բարդ համադասական նախադասության երկրորդ միավորով պարզաբանվում, բնութագրվում, հատկանշվում է այն առարկան, որի մասին խոսվել է առաջին միավորում: Եվ շաղկապից անմիջապես հետո դրվում է մի ցուցական դերանուն, որն ակնարկում է պարզաբանվող առարկան: Այդ առարկայի անունը կա՛մ այլևս չի կրկնվում երկրորդ միավորում, և նրա փոխարեն դրվում է ցուցական դերանունը, կա՛մ կրկնվում է՝ ստանալով այդ դերանուն որոշիչը: Հաճախ առաջին միավորում բնութագրվելիք առարկան դրսևորող անդամն ստանում է մի որոշիչը, որը, տրամաբանական շեշտը կրելով իր վրա, կազմում է տվյալ միավորի հնչերանգային բարձրակետը, իրենով ազդարարում է գաղիք բացատրությունը և դրանով իսկ կատարում կապակցական որոշ դեր: Օրինակ՝ «...Պատկերավոր ասած, ընայած XX դարի այդ բոլոր բազմաթիվ «անուններին», նա միայն մի ազգանուն ունի, և այդ ազգանունն է կոմունիզմ» (Հ, էջ 4): «Բարությունն ու միամտությունը կաթում էր նրա փափուկ դեմքի ամեն մի խորշումից, և այդ դեմքը մի տեսակ բութ-պայծառ արտահայտություն ուներ» (ՆԴ, 3, էջ 7): «Ահա բացվում է կոխողային կյանքի առօրյան, և լևոնն է այդ առօրյայի կենտրոնական զսպանակը» (ՆԶ, էջ 188): «Վայրի թռչունները ֆերմայում սկսել էին ձու ածել, և դա նրանց առաջին պտուղն էր» (ՍԱ, էջ 262):

Ծրբեմն միայն՝ նման բարդ համադասական նախադասությունների (հարակցա-բնութագրական կապակցությամբ) երկրորդ բաղադրիչում կրկնվում է առարկայի անունը՝ առանց ցուցական որոշիչ: Օրինակ՝ «Գարուն է, և գարունն ավելի է գեղեցկացնում Արարատյան դաշտը» (ՂՀԼ, էջ 131):

բ) Լրացուցիչ տեղեկությամբ—Բարդ համադասական նախադասության առաջին բաղադրիչում խոսվում է մի բանի (առարկայի, երևույթի, գործողության, եղելության) մասին, երկրորդ՝ հարակցվող բաղադրիչով որևէ լրացուցիչ տեղեկություն է տրվում նրա վերաբերյալ:

Այս կարգի բարդ նախադասության երկրորդ միավորում նույնպես կարելի է օգտագործել ցուցական դերանուն, բայց վերջինս նույն դերը չի ունենա, ինչ որ հարակցա-բնութագրական կապակցության ժամանակ. այն մատնացուց է անում ոչ թե առարկա, որի մասին խոսվում է տվյալ բարդ համադասական նախադասության առաջին միավորում, այլ՝ կա՛մ այդ միավորի որևէ բովանդակությունը, կա՛մ այնտեղ ակնարկված երևույթը (ծրբեմն էլ՝

<sup>5</sup> Մեջբերվող օրինակների ընդգծումները մերն են—Լ. Ն.:

<sup>6</sup> Պրոֆ. Աշոտ Աբրահամյանի խորհրդով՝ այս տերմինը գործածում ենք վերոհիշյալ առարկությունների (թե՛ ուսական և թե՛ հայկական) մեջ օգտագործված հադակցա-որոշչային տերմինի փոխարեն՝ նկատի առնենալով, որ այն ավելի ճիշտ է բնութագրում այդ կապակցության էությունը:



գործողությունը)<sup>7</sup>։ Օրինակ՝ «Տիկինը յուր ստացած տեղեկությունները մի մասը միայն պատմեց, և նամակի մեջ այդքանը միայն գրված պետք է լիներ» (ՐՆ, էջ 47)։ «Նախկին բարեկամները դուրս գնացին, և դա եղավ նրանց վերջին այցելությունը և վերջը բարեկամություն» (Շ, էջ 405)։ «— Դիմիր, ուր որ ուզում ես,— պատասխանեց Սմբատը վճռաբար.— ետ այդ կտակը համարում եմ կեղծ, և հուրիճողը Իսահակ Մարտիրոսյանցն է» (ն. տ., էջ 71)։

զ) Հարակցա-հետևաբանություններ—Բարդ համադասական նախադասության<sup>8</sup> և շաղկապով կապակցվող բաղադրիչներից առաջինով ներկայացվում է որևէ իրողություն, իսկ երկրորդով՝ նրան հարակից մի միտք, որը հետևանք է այդ իրողության։ Օրինակ՝ «Հարձակման գիշեր թե՛ ինքը և թե՛ յուր հայրը, որսորդության պատճառով, բացակա էին ժամրոցից, և այդ նպաստեց նրանց թշնամու ձեռքը չընկնել» (ՐՆ, էջ 282)։ «Մ. Աբեղյանի, իբրև գիտնականի ու մտածողի, մյուս բնորոշ գիծն այն է, որ նա կանգնած չէր միևնույն մակարդակին, քարացած հայացքների տեր մտածող չէր. նա աճում էր, զարգանում. և դա իր արտահայտությունն է գտել նրա գիտական ամբողջ գործունեության մեջ» (ՍՄ, № 3, 1965, էջ 66)։

Հարակցա-հետևանքային կապակցությունները տարբերվում են և շաղկապով բաղճյուսական հետևանքային կապակցություններից նրանով, որ եթե վերջիններում հետևանքն ու նրան նախորդող իրողությունը ներկայացվում են որպես մեկ բարդ իրավիճակի հավասար բաղադրամասեր և հավասար են նաև խոսողի վերաբերմունքի տեսակետից, նրանցից երկրորդն օրգանապես կապված է առաջինին, որպես ուղղակիորեն (շղափելի) նրանից բխող հետևանք, ապա առաջիններում գրությունն այլ է. այդպիսի բարդ համադասական նախադասությունների մեջ կապակցվող միավորներից երկրորդով հաղորդվում է առաջինի բովանդակությանը միայն հարակից, լրացուցիչ միտք՝ նրանից բխող հետևանքային երանգով, որը առաջինին հավասար չէ ոչ միայն հաղորդման նպատակով, այլև բարդ իրավիճակի ներկայացման մեջ ունեցած իր դերով։ Փաստորեն նման բարդ համադասական նախադասությամբ ներկայացվող պարզ մտքերից երկրորդը ածանցյալ նշանակություն ունի։ Բացի այդ, հարակցվող միավորը հնչերանգային այնպիսի սերտ ձուլում չի ստանում, ինչպիսին հատուկ է բաղճյուսական կապակցության միավորներին։ Այն ունենում է հնչերանգային որոշ առանձնացվածություն։

Համեմատենք բաղճյուսական հետևանքային հետևյալ կապակցությունը.

Թաղեցին նրան այս հողում ահա,

Եվ հողը դարձավ պարարտ ու բերրի...

(ԳԱՀ, էջ 106)

դ) Հարակցա-վերաբերմունքային—Հաճախ բարդ համադասական նախադասության մեջ և շաղկապով կապակցվում են այնպիսի միավորներ, որոնցից առաջինով ներկայացվում է որևէ գործողություն, եղելություն, իրավիճակ, իսկ երկրորդով՝ խոսողի (կամ այն անձի, որի մասին խոսվում է առաջին միավորում) վերաբերմունքը (կարծիք, ցանկություն, գնահատում) առաջին

<sup>7</sup> Ցուցական դերանունն այս դեպքում ունի նաև ստորե ընկալող իմաստային այլ հարաբերություններով հարակցական կապակցություններում։

միավորի բովանդակության նկատմամբ՝ հարակցական նշանակությամբ: Այսպիսի կապակցությունը մենք անվանում ենք հարակցա-վերաբերմունքա-յին:

Վերաբերմունքն արտահայտվում է կա՛մ վերաբերմունքային բառերի գործածությամբ երկրորդ միավորում, կա՛մ վերջինիս ողջ բովանդակությամբ: Օրինակ՝ «Փչացած մի երիտասարդ արտասվում է, և դա վատ նշան չէ» (Շ, 3, էջ 206):

Ի՞նչ,


Քեզ պահում են ձեռքերի վրա՞,

Եվ դու ուրա՞խ ես...

(ԳԷԱՏ, էջ 143)

Եվ շաղկապով հարակցական կապակցությունները բարդ համադասական նախադասություններում ունենում են կառուցվածքային հետևյալ առանձնահատկությունները. կապակցությունը սովորաբար լինում է երկանդամ, և հարակցվող միավորը միշտ դրվում է երկրորդ տեղում (տե՛ս վերևի օրինակները): Հարակցվող միավորը «հազվադեպ կարող է շարադասվել առաջին նախադասության մեջ իբրև միջանկյալ նախադասություն. համեմատի՜ր՝ Մի հանգամանք, որի մեջ խառն էր, և նա ինքն էլ չէր թաքցնում, Մազունի Համոյի մատը» (ԶԵ, էջ 295)<sup>8</sup>:

Հարակցությամբ կապակցվող միավորները լինում են թե՛ պարզ և թե՛ բարդ նախադասություններ: Երբ երկրորդ միավորը լինում է բարդ ստորադասական նախադասություն, և երկրորդական նախադասությունն ունենում է առաջադաս շարադասություն (անմիջապես հաջորդում է առաջին միավորին), հարակցվողը լինում է ոչ թե միայն երկրորդական նախադասությունը, այլ ողջ բարդ ստորադասական նախադասությունը: Այն կարտահայտվի այսպիսի գծապատկերով.




Օրինակ՝ «...ինչո՞վ կարող ենք օգտակար լինել մենք հնգամյակի աշխատանքներին:— Ամենաառաջինը լավ սովորելով: Մենք ունենք մասնագետների խիստ կարիք, և եթե դուք դառնաք լավ մասնագետներ, ապա դա կլինի ամենամեծ օգնությունը» (ՊԿ, 23. VIII. 1973):

Իսկ եթե բարդ ստորադասական նախադասությունը առաջին միավորն է, և երկրորդական նախադասությունն ունի վերջադաս շարադասություն, որին և անմիջապես հաջորդում է հարակցվող միավորը, ապա երկրորդ միավորը հարակցական հարաբերության մեջ է լինում ոչ թե միայն երկրորդա-

<sup>8</sup> Վ. Առաքելյան, Նշվ. աշխ., էջ 355:

կան նախադասություն, այլ ողջ բարդ ստորադասական նախադասություն հետ: Գծապատկերը կլինի այսպես.



Օրինակ՝ «...դա այնպիսի կողոպուտ էր, որի դեմ աշխատավոր մարդը չէր կարող չըմբոստանալ, և Զեյթունը մերժեց ազա՜ տիրակալի սյահանջը» (ՄԴ, 10. VI. 1970):

Եվ շաղկապով հարակցությամբ կապակցվող միավորում սովորաբար գործածվում է ցուցական դերանուն, որով, ինչպես ասվեց, ակնարկվում է կա՛մ ողջ առաջին միավորի բովանդակությունը, կա՛մ նրանում արտահայտված որևէ առարկա: Հաճախ այդ ցուցականի հետ բառակապակցություն է կազմում առաջին միավորից «պոկված» որևէ բառ կամ բառակապակցություն, որին վերաբերում է հարակցվող միտքը: Երբեմն հարակցվող միավորում կրկնվում է այն բառը կամ բառակապակցությունը, որին հարակից հաղորդում է այդ միավորի միտքը. որոշ դեպքերում էլ դրանց փոխարեն գործածվում է հոմանիշ մեկ այլ բառ կամ բառակապակցություն, կամ էլ այնպիսի բառակապակցություն, որը ակնարկում է առաջին միավորի ողջ բովանդակությունը: Հիշյալները նույնպես կարող են ուղեկցվել այդ ցուցականով: Երբեմն էլ վերը թվարկվածներից ոչ մեկը չի գործածվում երկրորդ միավորում: Նման դեպքերում նրա ողջ բովանդակությունից ու հնչերանգից է հասկացվում, որ նրանով հաղորդվողը հարակից միտք է:

Օրինակ՝ «Էնոնը լիպարիտից մեծ էր երկու տարով, և դա նրան հնարավորություն էր տվել մասնակցելու քաղաքացիական կռիվներին» (ՆԶ, էջ 84): «Հասարթյանին գրեթե չէին խոսեցնում, և սա նույնիսկ գոհ էր դրանից» (ՍԽ, էջ 279): «Իջևանի շրջանում ինտերնացիոնալ բարեկամության կամուրջը հաստատ է գցված, և թող բանուկ լինի այն ընդմիշտ» (ՄԴ, 21. X. 1970): «Աշուն է, և աշունը երփներանգել է անտառներով ծածկված սարալանջերը» (Ա, 12. VII. 1973): «Բանվորները որոշեցին այդ շուգունից Վ. Ի. Լենինի արձանը ձուլել: Տեղացի վարպետներից ինչ-որ մեկը կավից ծեփել էր արծառը, և հենց այդ արծառն էլ ձուլել տվեցին» (Գ, № 3, 1971, էջ 21): «Այսպիսի ցենսորիֆուզների օգնությամբ հեշտությամբ կարելի է բջջի բաղադրիչ մասերը իրարից անջատել, և այս շատ արժեքավոր մեթոդը հնարավորություն է տալիս առանձին ուսումնասիրելու բջջի յուրաքանչյուր մասի հատկությունները» (Կ, էջ 137): «Ոչ մի կերպ խոսակցությունը չէր ստացվում, և բոլորիս համար էլ շատ անտանելի էր լիսյո՛» (ԿՊ, էջ 207): «Ոլորապտույտ կածանով մենք բարձրանում էինք, և մեր ոտներից ելնող փոշին ոչ թե սպիտակ էր, այլ արեւվազույն» (ՍԱ, էջ 122):

Վերջին օրինակում՝ հարակցվող միտքը վերաբերում է ոչ թե առաջին միավորի բովանդակությանը, այլ նրա հետեանքին, որը բացակայում է (մեր ոտներից փոշի էր բարձրանում):



Բարդ համադասական նախադասության մեջ և շաղկապով հարակցությունամբ կապակցվող միավորների ստորոգյալներն արտահայտվում են բայի թե՛ միևնույն և թե՛ տարբեր եղանակա-ժամանակային ձևերով. դա կախված է երկու միավորների բովանդակությունների իրական հարաբերություններից և որևէ նշանակություն չունի հարակցական հարաբերության արտահայտման համար:

Հարակցական հարաբերությամբ կապակցվող պարզ նախադասությունների ստորոգյալները գերազանցապես արտահայտվում են սահմանական ևղանակի ներկա կամ անցյալի անկատար ժամանակային ձևերով (հատկապես՝ սովորույթի, մշտատևության, ընդհանրության նշանակություններով), քանի որ այդպիսի բարդ նախադասություններ օգտագործվում են մեծ մասամբ նկարագրությունների ժամանակ, բայց կարող են արտահայտվել նաև այլ ձևերով (տե՛ս վերևի օրինակները):

Եվ շաղկապով հարակցական կապակցությունն օժտված է լինում ընդհանրապես հարակցական կապակցություններին հատուկ հնչերանգով. ստալին միավորն ունենում է հավասար բարձրացող-իջնող հնչերանգ, որին հետևում է բավականաչափ տեական դադար, որ կարելի է գրության մեջ արտահայտել միջակետով (սովորաբար արտահայտում են ստորակետով), իսկ երկրորդ միավորը իրենից ներկայացնում է որոշ խնդրությունություն ունեցող միտք, որի պատճառով ստանում է հնչերանգային առանձնացվածություն: Սա իր մեջ պարունակում է հաղորդման նպատակի առումով կենտրոնական նշանակություն ունեցող անդամ (կամ հատված), որն էլ կազմում է այդ միավորի հնչերանգային բարձրակեսը: Եվ որովհետև այդ անդամը կարող է ընկած լինել թե՛ նախադասության սկզբում, թե՛ նրա մյուս անդամների միջև և թե՛ վերջում, ապա նրա հնչերանգը միակերպ լինել չի կարող. այն մերթ շնշտակի բարձրացող-հավասար իջնող է (սովորի թուլություններ ֆերմայում սկսել էին ձուլ ածել, և դա նրանց առաջին պտուղն էր)։— ՍԱ, էջ 260), մերթ՝ հավասար բարձրացող-շնշտակի իջնող (սՄեր ծանոթությունը միանգամից փոխվեց մտերմության, և դրա պատճառը Տերյանն էր.— ԳԹ, 16. VII. 1971), մերթ՝ հավասար բարձրացող-իջնող (սՏիգլերում մի հավատարիմ մարդ է հարկավոր, և այդ մարդը դու պետք է լինես)։— ԲԵ, էջ 251): Բոլոր դեպքերում էլ վերջանում է նախադասության ավարտին հատուկ հնչերանգով:

Ու շաղկապով ճարակցակցում կապակցությունը— Ու շաղկապով հարակցական կապակցությունը բարդ համադասական նախադասություններում այնքան էլ տարածված չէ: Դա բացատրվում է նրանով, որ ու շաղկապը կապակցում է ավելի սերտ միավորներ, իսկ հարակցական կապակցության մեջ, ընդհակառակն, մտնում են իմաստային ոչ այնքան սերտություն ունեցող միավորներ:

Ու շաղկապով հարակցական կապակցությունները ճիշտ և ճիշտ նույնական են եւ շաղկապով նման կապակցությունների հետ թե՛ կապակցվող միավորների իմաստային առնչումներով և թե՛ կառուցվածքային առանձնահատկություններով:

Ահա՛ օրինակներ.

Հարակցա-բնութագրական

Փարվանա արքան մի աղջիկ ուներ.

Ու ոչ մի որսկան դեռ իրան օրում

էնքան գեղեցիկ եղնիկ չէր տեսել՝  
 Իր որսն անելիս մըթին սարերում:

(Թ, 1, էջ 224)

Լրացուցիչ տեղեկության՝ «Միծեռնակը բույն էր շինել մեր սրահի օճոր-  
 բում: Ամեն տարի աշնանը գնում էր, գարնանը ետ գալի: Ո՛ր նրա բույներ  
 Վիշտ կպած էր մեր սրահի օճորփին» (ն. տ., էջ 355):

Հարակցա-հետևանքային՝ «Արժիվները գալիս են խեղճ աղջկան ուտում,  
 ու էդ տխուր դեպքիցը որպես հիշատակ կուծն է մնում ծառի ծերին» (ՍԱ,  
 էջ 169):

Որակման՝

Այդ օրը սուգ էր Մոսկովում,  
 Ո՛ր սուգը վառ էր---

(ՉԵ, էջ 101)

Հարակցա-հավելման՝ «...իմաստուն ձև երազները, ու մորդ հոգին քու  
 երջանկության համար է խոսում» (Թ, 2, էջ 340):

Իսկ շաղկապով հարակցական կապակցություն— Հարակցական է իսկ  
 շաղկապով այնպիսի կապակցությունը, որի երկրորդ միավորով հաղորդվում  
 է որևէ լրացուցիչ տեղեկություն առաջին միավորում հաղորդվածի կամ այն  
 առարկայի վերաբերյալ, որի մասին խոսվել է առաջին միավորում:

Այստեղ առհասարակ բացակայում է զուգահեռականությունը, որը հա-  
 տուկ է իսկ շաղկապով հանդիպադրական-հակադրական կապակցություննե-  
 րին. այսպիսի կապակցությամբ բարդ համադասական նախադասություննե-  
 րի բաղադրիչները չունեն գործողությունների զուգահեռ ընթացք, ինչպես  
 նաև՝ բովանդակությունների «զուգահեռ կշիռ»: Օրինակ՝ «Ձյունագագաթ  
 Կապույտջիղը շուրջ էր բերլ ն. Հանդի վրա, իսկ Հանդը գլուղ է առանց հանդի ու  
 լայնարձակ դաշտերի» (Ա, 5. VI. 1971):

Իհնև իսկ շաղկապով՝ հարակցական կապակցություն ունեցող բարդ հա-  
 մադասական նախադասությունների բաղադրիչները չեն ունենում հավասար  
 նշանակություն և միմյանց հետ հանդիպադրական-հակադրական հարաբե-  
 րության մեջ չեն լինում, ասկայն հաճախ երկրորդ բաղադրիչով տրվող լրա-  
 ցուցիչ տեղեկությունը հակադրական երանգավորում է ստանում առաջին բա-  
 ղադրիչով հաղորդվածի նկատմամբ: Այն արտահայտվում է կապակցվող  
 պարզ նախադասությունների բայ ստորոգյալների տարբեր բնույթներով  
 (եթե առաջին պարզ նախադասության ստորոգյալն արտահայտված է լինում  
 բայի հաստատական խոնարհմամբ, ապա երկրորդին արտահայտվում է ժխտա-  
 կան խոնարհմամբ, և ընդհակառակը) և այդ պարզ նախադասությունների  
 ողջ բովանդակություններով կամ միայն վերջինով (ինչ խոսք՝ մյուս կողմից  
 էլ իսկ շաղկապն է իր իմաստը հաղորդում): Օրինակ՝ «Շահյանը երբեք չէր  
 սիրել մոր համբույրները, իսկ մայրն այդ կողմից շատ ջուլյ էր եղել դեպի  
 նա» (ՆԴ, 4. 3, էջ 240): «Ձնայելով որ Շահյանն ինքն էր Մինասյանին հրա-




վիրել իր մոտ տեղափոխվելու, բայց և այնպես ընկերոջ ներկայությունն իրենց տանը շատ էլ հաճելի չէր նրա համար: Նա սովոր էր միայնակեցությամբ, իսկ ընկերոջ ներկայությամբ ճնշող դրության մեջ էր դրել նրան (ն. տ., էջ 349):

Երբեմն էլ իսկ շաղկապով հարակցվող միավորը լինում է լրացուցիչ բացատրություն՝ որպես առաջին միավորի բովանդակությունից բխող հետևություն՝ մի կողմից, և որպես միջոց կամ պայման առաջին միավորի գործողության համար՝ մյուս կողմից: Օրինակ՝ «Նախքան շուկաներում ապրանքների իրացնելը և օգուտ ստանալը հարկավոր է դրանք արտադրել, իսկ արժեք ստեղծել կարելի է աշխատանքի՝ և միայն աշխատանքի միջոցով» (Հ., էջ 105): «Ժամանակակից արդյունաբերության և տնտեսության բուռն զարգացումը հիմնադրար պահանջում է գիտության նվաճումների արագ ներդրում ու աշխատանքի նոր տիպի կազմակերպում ողջ լայնությամբ ու խորությամբ, իսկ դա չի կարող տեղի ունենալ առանց հաշվողական տեխնիկայի (Ա., 29. V. 1971):

Իսկ շաղկապով հարակցական կապակցությունը բարդ համադասական նախադասություններում ունենում է կառուցվածքային հետևյալ առանձնահատկությունները.


Կապակցվող միավորները գերազանցապես լինում են պարզ նախադասություններ, և հարակցվող միավորը միշտ դրվում է երկրորդ տեղում: Երբեմն միավորներից մեկը լինում է բարդ ստորադասական նախադասություն: Այդպես է նաև և շաղկապով հարակցական կապակցության դեպքում, բայց այս երկուսի միջև նկատվում է որոշ տարբերություն. եթե և շաղկապով կապակցվելիս՝ երկրորդ միավորի հարակցվող միտքը վերաբերում է առաջին տեղում գտնվող ողջ բարդ ստորադասական նախադասությանը, ապա իսկ շաղկապով կապակցվելիս՝ մտքով հարակցվում են անմիջապես շաղկապին «շփվող» մասերը, այսինքն՝ եթե բարդ ստորադասական նախադասությունն առաջին տեղում է, և երկրորդական նախադասությունն ունի վերջադաս շարադասություն, որին անմիջապես հաջորդում է իսկ շաղկապով ուղեկցվող միավորը, ապա վերջինիս՝ հարակից, լրացական միտքը վերաբերում է երկրորդական նախադասությանը: Այն կարելի է ցույց տալ այսպիսի գծապատկերով.



Օրինակ՝ «Օրվա հերոսը Գարեգինն է, որովհետև ի վն է ցանկանում, իսկ ի վն այդ ժամանակ աշխարհի ամենաներշնչելի ու ամենամեծ մարդն էր» (ԱԱ., էջ 115):

Իսկ եթե բարդ ստորադասական նախադասությունը երկրորդ տեղում է, ապա հարակցվող միտքը հաջորդվում է ողջ բարդ ստորադասական նախա-

դասություն միջոցով (ինչպես և շաղկապով կապակցության դեպքում), և կոտացվի այսպիսի գծապատկեր.



Օրինակ՝ «Վերջին տասնամյակում մեր գրականությունը ծանր կորուստներ ունեցավ, իսկ գրողի աշխատանքը սովորական պաշտոն չէ, որ անմիջապես փոխարինվի մեկ ուրիշով» (ԳԹ, 4. VI. 1971):

Իսկ շաղկապով հարակցությամբ կապակցվող միավորում ցուցական դերանվան գործածությունը սակավադեպ է: Այնտեղ կրկնվում է այն առարկայի, երևույթի անունը (նույնությամբ կամ ձևափոխված), որի նկարագրությունն է տրվում հարակցվող միավորում, կամ էլ նրա փոխարեն գործածվում են հոմանիշ բառեր ու բառակապակցություններ: Այսպես՝ «Պատերազմի տարիներին կոլտնտեսության նախագահն ու անփորձ բրիգադիրները միտումնաբերականորեն խորհուրդ հարցնում, թե որ հանդամասում ինչ ցանել և ինչպես մշակել այն. իսկ իմ միտումնաբերական պայքար հինգ մատի պես գիտեր մեր գյուղի հանդը» (Ա, 5. VI. 1971): «Միթեայելն ուշադրություն չէր դարձնում հրդեհի վրա, իսկ ամենի գազանը քանի գնում ուռչում էր ու մեծանում» (Շ, էջ 391):

Երբեմն միայն հարակցվող միավորում օգտագործվում է ցուցական, որով ակնարկվում է առաջին միավորի բովանդակությունը կամ այն հատվածը, որի վերաբերյալ հարակից միտք է հաղորդվում, ինչպես՝

«...Դու կոթբախտանաս, իսկ ես այդ շնամ տւում» (Շ, էջ 333):

Բարդ համադասական նախադասության մեջ իսկ շաղկապով հարակցությամբ կապակցվող միավորների ստորոգյալները գերազանցապես արտահայտվում են տարբեր եղանակա-ժամանակային ձևերով, բայց կարող են արտահայտվել նաև միևնույն ձևով: Դա կախված է հարակցվող միավորի նկատմամբ խոսողի ունեցած վերաբերմունքից, խոսելու պահի և հաղորդվող գործողությունների ժամանակների հարաբերությունից և երբեմն միայն՝ երկու միավորների գործողությունների ժամանակային հարաբերությունից. այդպիսով դեպքում, երբ հարակից հաղորդվող գործողությունը ժամանակով համընկնում է առաջին միավորի գործողության հետ (տե՛ս վերևի օրինակները):

Իսկ շաղկապով հարակցական կապակցությամբ բարդ համադասական նախադասությունն օժտված է լինում յուրահասուկ հնչերանդով. երկու բաղադրիչներն էլ ունենում են պատմողական պարզ նախադասություններին հատուկ բարձրացող-իջնող հնչերանգ, սակայն առաջինը (որը հաղորդման նպատակի տեսակետից հիմնականն է համարվում) արտաբերվում է բարձր հնչեղությամբ, իսկ երկրորդը (որը հաղորդման նպատակի տեսակետից երկրորդական նշանակություն ունի) արտաբերվում է ցածր հնչեղությամբ: Եր-

կու միավորների միջև դադարն այնքան ցայտուն է և տեական, որ նախընտրելի է իսկ շաղկապից առաջ ոչ թե ստորակետ, այլ միջակետ դնել:

Նրբեմն բարդ համադասական նախադասություններում հարակցական կապակցությունն իրացվում է մինչդեռ շաղկապի միջոցով: Կապակցվող միավորներն ունենում են իմաստային նույն հարաբերություններն ու կառուցվածքային նույն առանձնահատկությունները, ինչ որ իսկ շաղկապով հարակցական կապակցության դեպքում: Օրինակ՝ «Տեսուչները դեպքից-դեպք են հետաքրքրվել ուսման մեջ ետ մնացող երկտարեցի աշակերտների հետ տարվող աշխատանքներով, մինչդեռ քաղաքի դպրոցներում դասընթացը կրկնելու է թողվել 5 հազարից ավելի երեխա» (ՍԴ, 21. X. 1970):

Իայց շաղկապով հարակցական կապակցությամբ — Իայց շաղկապով կապակցությունները բարդ համադասական նախադասություններում լինում են հիմնականում բաղադրիչների հակասման կամ սահմանափակման իմաստային հարաբերությամբ: Բայց շատ հաճախ բարդ համադասական նախադասության բաղադրիչներն այդ շաղկապով կապակցվում են այնպիսի հարաբերությամբ, երբ նրանցից երկրորդի բովանդակությունը ոչ թե ծագում է առաջինի բովանդակությունից՝ որպես տրամաբանորեն նրանից բխող հետևություն, հակասող, «ներա առաջն առնող» (կամ նրա բովանդակությունը սահմանափակող) միտք, այլ այն հանդես է գալիս իբրև առաջինի բովանդակությունը այս կամ այն կողմից լրացնող, պարզաբանող, նրա (կամ նրա անդամներից մեկ-նումիկի) հետ որևէ կերպ առնչվող՝ հարակից միտք: Համեմատենք Ետտրև բերվող նախադասությունները:

«Սիրտս լցվեց, քայց ես լաց չեղա» (Գ, 9, 1970, էջ 26), «Շատ արյունքոտինք թափեցին, քայց չկարողացան ժայռը շարժել տեղից» (ԿՀԼ, էջ 94), «Նա ուզում էր խոսել, քայց գրգռված Միքայելը չէր թույլ տալիս նրան՝ բերանն անգամ բանալու» (Շ, էջ 324) բարդ համադասական նախադասությունների միավորների միջև առկա է հակասման հարաբերություն՝ որոշ նրբերանգներով. առաջինում կա միայն հակասում, որի երկրորդ բաղադրիչով հաղորդվում է առաջին բաղադրիչի գործողությունից սպասված հետևության հակառակ միտք, երկրորդում՝ հակասում՝ որոշ սահմանափակումով (շատ արյունքոտինք թափեցին, բայց ոչ այն աստիճանի, որ ժայռը տեղից շարժվեր), երրորդում՝ դարձյալ հակասում, որտեղ երկրորդ բաղադրիչով խափանվում է առաջինի գործողությունը («ներա առաջն առնվում է»): Նրեք բարդ նախադասությունների մեջ էլ երկրորդ բաղադրիչի բովանդակությունը բխում է առաջինի բովանդակությունից: Մինչդեռ «Վաղ գարնան առավոտի ցրտից նրա մարմինը թեթևակի փշաքաղվել էր. բայց ի՞նչ դուրեկան սառնություն էր դա» (ՍԱ, էջ 16) բարդ համադասական նախադասության բաղադրիչների հարաբերությունը այդպիսին չէ, թեև նրանք նույնպես կապակցվել են հակասման հարաբերություն արտահայտող քայց շաղկապով: Այստեղ երկրորդ միավորի բովանդակությունը չի բխում առաջինից որպես նրանից սպասվող հետևության հակառակ միտք, այլ այն մի լրացուցիչ, հարակից հաղորդում է առաջին միավորում խոսվածի նկատմամբ:

Բայց շաղկապով հարակցական կապակցություններն, այնուամենայնիվ, նրբեմն «բեռնվում են» միավորների բովանդակությունների, այսպես կոչված, ներքին հակասման հարաբերությամբ. բարդ համադասական նախադասության առաջին միավորով հաղորդվում է մի միտք, հարակցվող միավորով՝



լրացուցիչ տեղեկություն տվող մեկ այլ միտք, որը ներքին հակասության մեջ է գտնվում առաջինի նկատմամբ: Այսպիսի կապակցությունը զուրկ է հակասման հարաբերության դրսևորման այն միջոցներից, որոնք հատուկ են բայց շաղկապով հակասական կապակցություններին (միավորների տարբեր բնույթի խոնարհմամբ բայ ստորոգյալ ունենալ, հակասման հարաբերություն արտահայտող բառերի գործածություն): Հարակցվող միավորի բովանդակությունն առաջինին հակասում է ճայլաբանորեն կամ նշանակությամբ<sup>9</sup>: Օրինակ՝ «...ես հավանում եմ ձեր եղբոր հոմորը, բայց... համը տանում է» (ՆԻ, 3, էջ 86): «...լսել ենք, որ մեզ պետք է տանես հեռավոր Սպահան, Տառ, բայց մենք չենք մոռանա մեր նոր հայրենիքը՝ Հայաստանը» (ԲԵ, էջ 475): «Իմ միակ ցանկությունն է՝ ցույց տալ մարդկանց եղբայրությունը: Ընդհանրապես մարդիկ ամաչում են նման հայտարարություն անել: Վախենում են ծիծաղելի երևալ, բայց դա ինձ չի անհանգստացնում» (ԳԹ, 17, VIII, 1973):

Նրբեմն ներքին հակասման հետ «շաղկապվում են» այլ մասնակի հարաբերություններ՝ հաճախապես անհամապատասխան, ինչպես՝ «Օգոստոս ամսին երկու թունելախորշում կատարվել է 150 մետր առաջանցում. վատ ենք աշխատել, բայց դժվարությունները շատ շատ են» (ՍԴ, 10, VI, 1970), հաճախա-հավելական, որտեղ խոսողը խիստ կարեկորություն է տալիս հարակցվող միավորի բովանդակությանը, ինչպես՝ «Ոչ. նա չարժե», որ ես մեռնեմ նրա համար... նա, այո՞, դավաճանեց յուր հայրենիքին, բայց դավաճանեց և—ի՛նձ...» (ԲԵ, էջ 318), հաճախա-սանձափակման կամ զիջման, ինչպես՝ «Բայց մտածում էր. այո՞, հայ կինը լուռ ու մունջ դիմանում է մարդու անառակություններին, բայց նա՛ էլ հողային էակ է, նա՛ էլ սիրտ ունի, արյուն ունի» (Շ, էջ 130) և այլն:

Հաճախ բայց շաղկապով հարակցվող միավորը լինում է հարցական նրանգի, որով (կամ որի պատասխանով) խոսողը ցանկանում է լրացուցիչ տեղեկություն ստանալ առաջին միավորով հաղորդվածի կամ նրանում ներկայացված առարկայի, հատկանիշի կամ գործողության մասին, կամ էլ նա մտորում է առաջին միավորի բովանդակության վերաբերյալ: Օրինակ՝ «Իսկական մարդու բնակարաններ, բայց ի՞նչ հրաշքով են հասել նրանք այստեղ» (ՍԱ, էջ 174): «Այդ բոլորը ճիշտ է, Մանասար քեռի, բայց որտեղից գտնենք այդքան կեր» (ՍԽ, էջ 75):

Ի տարբերություն և, իսկ շաղկապներով հարակցական կապակցությունների, բայց շաղկապով կապակցությունների մեջ հաճախ հարակցվող միավորը հաղորդման նպատակի տեսակետից ավելի «ծանրակշիռ է լինում», քան առաջին միավորը. խոսողը մի տեսակ թերի, քիչ է համարում առաջին միավորով հաղորդվածը և երկրորդով լրացնում է այդ «պակասը»՝ առավել կարեկորություն տալով նրան: Այսպիսով, հարակցվող միավորը ամբողջացնում է հաղորդվելիք ողջ միտքը. այնպես որ նրա բովանդակությունը թեև լրացուցիչ, բայց ամենեին էլ երկրորդական միտք չէ: Այդ պատճառով էլ այն արտաբերվում է շեշտված առոգանությամբ: Այսպես՝ «Թող ծեն ու ծաղկեն երկու տոհմերի զավակները, բայց հարսանիքի հովանու տակ մենք պետք է անցկացնենք մեր քարավանը, մեր միության գործը» (ԱԻՕ, էջ 173): «Այդ

9 Վ. Առաքելյան, Նշվ. աշխ., էջ 334:

անկարելի է: Չարիքը գուցե յուր հոտից տարել է սրտմտությամբ վառված Սևադային, բայց Սևադան ինքը այդ շարիքը չէ՛ր ստեղծիլ» (Մ. 3, էջ 118):

Երբեմն հարակցվող միավորը ներկայացնում է մի հանկարծահաս միտք, որը միայն ինչ-որ աննշմարելի, հեռավոր կապ ունի առաջին միավորի բովանդակության հետ. խոսելու պահին մտքի թռիչք է կատարվում մի երեվույթից մյուսը. ինչպես՝ «Ուշինչ, Տիգրանիկս, ուշինչ չկա, մի վախիր... բայց այսօր դու ուսումնարան չպիտի՛ գնաս» (ՆԴ, 1, էջ 315):

Բայց շաղկապով հարակցական կապակցությունը բարդ համադասական նախադասություններում ունենում է կառուցվածքային հետևյալ առանձնահատկությունները.

Բարդ համադասական նախադասություններում բայց շաղկապով հարակցական կապակցությունը, ինչպես բոլոր հարակցական կապակցությունները, լինում է երկբաղադրիչ, և հարակցվող միավորը դրվում է երկրորդ տեղում: Կապակցվող միավորները դարձյալ գերազանցապես լինում են պարզ նախադասություններ (սե՛ս վերևի օրինակները), երբեմն նաև՝ բարդ նախադասություններ, որոնք գիտվում են իբրև մեկ ամբողջություն, և այդ ամբողջություններն են իմաստային հարաբերության մեջ մտնում միմյանց հետ:

Օրինակ՝ «Ախ, ինչո՞ւ ես այսպես գունատ եմ,— ասում էր նա տխուր նայելով իր դեմքին, բայց նա չգիտեր, որ այդ գունատությունն ավելի էր սաղում նրա դեմքին, քան շատերի կարմրությունը» (ՆԴ, 1, էջ 316):

Հարակից միավորում երբեմն կրկնվում է առաջին միավորի վազմի մեջ եղող որևէ բառ (նույնությամբ կամ ձևափոխված), որին վերաբերում է հարակցվող միտքը, երբեմն էլ գործածվում է ցուցական (կամ անձնական) դերանուն, որը ակնարկում է կամ առաջին միավորի ողջ բովանդակությունը, կամ էլ նրանում ներկայացված որևէ առարկա: Հիշյալ բառերի գործածությունը երկրորդ միավորում՝ բոլոր դեպքերում պարտադիր չէ. այն կախված է հարակցվող միավորի բովանդակության սերտության աստիճանից:

Բարդ համադասական նախադասության մեջ բայց շաղկապով հարակցությամբ կապակցվող միավորների ստորոգյալներն արտահայտվում են բայի թե՛ միևնույն և թե՛ տարբեր եղանակա-ժամանակային ձևերով. դա կախված է առաջին միավորի ներկայացրած գործողության (եղելության, երևույթի) և հարակցվող միավորի գործողության միմյանց հետ առնչակցման ժամանակային հարաբերությունից, ինչպես նաև՝ խոսողի՝ հարակից միտքը ներկայացնելու նպատակից. այնպես որ այն որևէ որոշիչ դեր չունի կապակցվող միավորների հարաբերությունները (իմաստային կամ քերականական) արտահայտելու մեջ: Խոնարհման բնույթով նույնպես բայ ստորոգյալները կարող են թե՛ նույնական լինել և թե՛ տարբեր, միայն թե տարբեր բնույթի լինելու դեպքում, ինչպես նշվեց վերը, միավորների ներքին հակասման հարաբերությունն ավելի զգալի է դառնում:

Բարդ համադասական նախադասության մեջ բայց շաղկապով հարակցական հարաբերությամբ կապակցվող միավորները ևս ունենում են հավասար բարձրացող-իջնող հնչերանգ, ինչպես իսկ շաղկապով նույնպիսի հարաբերությամբ կապակցվող միավորները: Բայց, ի հակադրություն վերջինների, բայց շաղկապով կապակցվող միավորներից երկրորդը շատ հաճախ ավելի բարձր հնչողությամբ է արտաբերվում, քան առաջինը: Դա բխում է նրանից, որ եթե իսկ շաղկապով կապակցվող միավորներից առաջինն է հաղորդման

նպատակի տեսակետից կարևոր նշանակություն ունեցողը, ապա բայց շաղկապով կապակցության մեջ այդպիսի նշանակություն է ստանում երկրորդ միավորը, թեև այն հանդես է գալիս որպես լրացուցիչ հաղորդում: Այլ կերպ ասած, բայց շաղկապով հարակցական կապակցությամբ բարդ նախադասության բովանդակությունը ճաղդորդելուց առաջ խոսողը հատուկ նպատակ է ունենում հաղորդել ճեմց երկրորդ միավորի բովանդակությունը, և այդ միտումով էլ նա նախապես առաջ է քաշում մի միտք (1-ին միավոր), որի հետ առնչակցվում է հաղորդման բուն նպատակը հանդիսացող միտքը (2-րդ, հարակցվող միավոր): Անգամ եթե հարակցվող մտքի հաղորդումը նպատակալի՛ն էլ չի լինում, այդ միտքը հետո՛ է առաջանում, որպես հանկարծահաս միտք, այդ դեպքում էլ դարձյալ այն կարևոր նշանակություն է ստանում: Օրինակ՝ «Այդպես հեշտ է շամփրել գազանին, բայց քո քաջությունը նիզակը դուրս քաշելումը պիտի տեսնենք» (ԲՆ, 502): «Օգոստոս ամսին երկու թունելախորշում կատարվել է 150 մետր առաջանցում. վատ ենք աշխատել, բայց դժվարությունները շատ շատ են» (ՄԴ, 10. VI. 1970):

Բայց շաղկապով հարակցությամբ կապակցվող միավորների ինքնուրույնությունն առավել որոշակի է. առաջարկվում է դրանք միմյանցից բաժանել միջակետով (ընտրված օրինակներում էլ հանդիպում ենք այդպիսի տրոհման):

Բարդ համադասական նախադասության մեջ սակավ դեպքերում հարակցական կապակցությունն իրացվում է նաև բայց շաղկապին հոմանիշ սակայն և համա շաղկապներով, որոնցից առաջինը հատուկ է գրական բարձր ոճին, երկրորդը՝ բարբառներին: Այդպիսի կապակցությունները միշտ և ճիշտ նույնական են բայց շաղկապով կապակցությունների հետ թե՛ կառուցվածքային առանձնահատկությունների և թե՛ կապակցվող միավորների իմաստային հարաբերությունների առումով:

Ահա՛ օրինակներ. «Բարձրահարկ շենքերը նոր տեսք կտան երիտասարդ քաղաքին, սակայն ձգձգվում է բարձրահարկ շենքերի կառուցումը» (Ա, 8. VII. 1971),

... Առ էս մորթին ու ինձ համար

Մի գդակ կարի գըլխիս հարմար:

Վարձիդ համար միամիտ մընա,

Համա-համա շատ չուշաճա:

(Թ. 1, էջ 195)

Էլ շաղկապով հարակցակցում կապակցություն—Բարդ նախադասություններում հարակցական կապակցությունն իրացվում է նաև էլ միավորիչ շաղկապով: Այս դեպքում կապակցվող երկրորդ միավորով հարակցությամբ մի լրացուցիչ միտք է հաղորդվում առաջին միավորով հաղորդվածի նկատմամբ սաստկական, հավելական նշանակություններով:

Սրանք կառուցվածքային որոշ առանձնահատկություններով տարբերվում են նախորդներից. երկրորդ միավորում անպայման օգտագործվում է առաջին միավորից «պոկված» որևէ բառ (նույնությամբ կամ ձևափոխված) կամ նրա հոմանիշը և դրվում է թյու միավորի սկզբին՝ դառնալով նրա հնչերանգային բարձրակետը: Իսկ էլ շաղկապը, ի հակադրություն և, իսկ, բայց շաղ-



կապներին՝ նույնանման կապակցություններում գրաված դիրքի (նախադաս), շարադասվում է վերը նշված բառից հետո, արտասանության մեջ ձևավորվում է նրա հետ և ավելի ակնհայտ է դարձնում նրա շեշտվածությունը։ Օրինակ՝ «...Ամեն մի բուրժուա իր ֆանտազիան ունի, իմ ֆանտազիան էլ այս է պահանջում» (Շ, էջ 125)։ «Ի՞նչ եմ անում քո գանձն ու ոսկին, իմ ունեցածն էլ չգիտեմ որտեղ պահեմ» (Թ, 2, էջ 482)։

Երբեմն էլ շաղկապը բաղադրվում է այն ցուցականի հետ, և ստացված այն էլ բաղադրյալ շաղկապը (գեղարվեստական գրականության մեջ ավելի շատ գործածական է էն էլ բարբառային ձևը) հարակցական կապակցությանը հաղորդում է զիջական երանգ։ Այս դեպքում հարակցվող միավորում այլևս չի գործածվում առաջին միավորից որևէ բառ կամ բառակապակցություն, այլ դրանք (կամ ողջ առաջին պարզ նախադասության բովանդակությունը) ակնարկողը բաղադրյալ շաղկապի այն բաղադրիչն է, որի նյութական իմաստը հաճախ այն աստիճան է մթազնվում, որ դժվար է լինում նկատել։ Օրինակ՝ «Մենակ որսկան Կարոն էս սահմանն անցկացավ, էն էլ դրա համար իրեն պատիժն ստացավ դեերից» (ՍԱ, էջ 164)։ Քիսյոյ ախր սա իսկական աղամանդ է,— վրդովվում էր Վերան,— սա աբժե երեսունյոթ ռուբլի, ԱՅՆ էլ դիպվածով զնված» (ԿՊ, էջ 178)։

Էլ շաղկապով հարակցության մեջ կապակցվող միավորների ստորոգյալներն արտահայտվում են բայի թե՛ միևնույն և թե՛ տարբեր եղանակա-ժամանակային ձևերով։

Ինչպես երևում է վերը շարադրվածից, բարդ համադասական նախադասություններում հարակցական կապակցությունն իրացվում է ինչպես բաղ-հյուսական, այնպես էլ ներհակական շաղկապներով, և բոլորի մեջ էլ երկ-րորդ միավորը կառուցվում է առաջին միավորի «հենքի վրա»։ այն լրացուցիչ, պարզաբանող, հարակից միտք է առաջին միավորով հաղորդվածի նկատմամբ։ Հարակցական կապակցությամբ բարդ համադասական նախադասություններում առաջանում է մտքի, ինչպես նաև՝ արտասանական ընթացքի «բեկվածություն», ստեղծվում է «ընդհատ» կառույցի կապակցություն։ Բայց, այնուամենայնիվ, տարբեր շաղկապներով կապակցություններ ցուցաբերում են որոշ յուրահատկություններ։

#### ՀԱՄԱՌՈՏԱԳՐՈՒԹՅՈՒՆՆԵՐ

Ա—«Նվանգարդ», երիտասարդական թերթ։

ԱԱ—Արիզ Ավագյան, Հարավային տեղ, Երևան, 1971։

ԱԲ—Ակսել Բակունց, Երկեր, հ. 1, Երևան, 1964։

ԱԽՕ—Մ. Արազի, Խարայի Օրի, Երևան, 1959։

Գ—«Գարուն» ամսագիր։

ԳԷԱՏ—Գևորգ Էմին, Այս տարիքում, Երևան, 1968։

ԳԷՆ—Գևորգ Էմին, «Նորք», Երևան, 1946։

ԳԹ—«Գրական թերթ», շաբաթաթերթ։

ԳՍԸ—Գեղամ Սարյան, Հատընտիր, Երևան, 1951։

Թ—Հովհ. Թումանյան, Երկեր, հ. 1, 2, Երևան, 1958։

Վ—Ընդհանուր կենսաբանություն, դասագիրք միջնակարգ դպրոցի 10-րդ դասարանի համար, Երևան, 1970։

ՉԶԼ—Մտ. Կուրտիկյան, Հայրենի լեզուններ, Երևան, 1957։

ԿՊ—Ա. Ի. Կուլրին, Պատմվածքներ, Երևան, 1968:

Հ—Հասարակագիտություն, գասագիրք միջնակարգ դպրոցի աղարտական գասարանների համար, Երևան, 1967:

ՂՀՀ—Ա. Ղարիրյան, Հայոց լեզու, գասագիրք 5—7-րդ դասարանների համար, Երևան, 1964:

Մ—Մուրացյան, Երկերի ժողովածու, 5 հատորով, հ. 3, Երևան, 1952:

ՆԴ—Նար-Դոս, Երկերի ժողովածու, հ. 2, Երևան, 1966, հ. 3, Երևան, 1955:

ՆԶ—Նաիրի Զարյան, Երկերի ժողովածու 6 հատորով, հ. 3, Երևան, 1963:

Ն. տ.—Նույն անդում:

Շ—Շիրվանզադե, Երկերի ժողովածու 10 հատորով, հ. 3, Երևան, 1959:

Զն—Զարենց, Ընտիր երկեր, Երևան, 1955:

ՊԿ—«Պրոններ կանչ» թերթ:

ՍԱ—Վ. Անանյան, Սեանի ափին, Երևան, 1961:

ՍԴ—«Սովետական դպրոց», Մանկավարժական թերթ:

ՍԽ—Սերո Խանզադյան, Երկերի ժողովածու, հ. 2, Երևան, 1967:

ՍՄ—«Սովետական մանկավարժ» ամսագիր:

ԲԵ—Բաֆֆի, Երկերի ժողովածու 10 հատորով, հ. 7, Երևան, 1956:

## ПРИСОЕДИНИТЕЛЬНАЯ СВЯЗЬ В СЛОЖНОСОЧИНЕННЫХ ПРЕДЛОЖЕНИЯХ СОВРЕМЕННОГО АРМЯНСКОГО ЯЗЫКА

ЛИЗА НАЛБАНДЯН

### Резюме

В системе сложносочиненных предложений особое место занимают такие сложные предложения, составные элементы которых объединяются присоединительными отношениями. Смысл второго элемента в таком сложносочиненном предложении «сплетается» лишь на «канве» первого элемента как дополняющий, изъясняющий, побочный, совокупный смысл. В присоединительных конструкциях составные элементы по своему содержанию не выступают как равноправные единицы и не имеют интонационного тождества. В таких конструкциях с помощью второго элемента обычно передается мысль, возникшая во время высказывания первого элемента, поэтому при таком смысловом соотношении составных элементов подобные сложные предложения более характерны для устной речи. Присоединительная связь осуществляется как с помощью соединительных, так и противительных союзов, однако конструкции, составленные с помощью разных союзов, проявляют своеобразные особенности. Присоединение может выступать в разных целях, откуда и вытекают оттенки смысловых отношений соединяющихся элементов (присоединительно-определительные, дополнительные сообщения, присоединительно-следственные, присоединительно-относительные, присоединительно-ограничительные и т. д.).